

1 51

FAICT SOMMAIRE DV PROCES TOVCHANT
le Prieuré de la sainte Trinité de Fougères, & de la Preuosté
de Vertou, d'entre maistre Pierre Leber, maistre Iean Vallet, &
Iaques Gigan.

Eu Maistre Michel Leber passa en ceste ville de Paris trois Procurations le 27. de Iuillet 1598. l'une de la Preuosté de Vertou, en faueur dudit maistre Pierre Leber son neveu, l'autre du Prieuré de Pont sur Seine, en faueur de Daniel Proust: & la 3. de la prebende de Paris en faueur de Charles Leber le jeune. Les grosses desquelles Procurations furent le lendemain deliurées audit resignant, lequel desirant principalement faire admettre celle de Vertou au profit dudit maistre Pierre Leber son neveu en fait si prompte diligence, qu'en fin elle est admise *nonis Septembris*, qui est le 5. dudit mois 1598. en la ville de Ferrare où lors estoit le feu Pape Clement VIII.

Le Conseil notera pour vne singuliere remarque qui porte coup en ce procès, que Maistre Iean Vallet du viuant dudit Maistre Michel resignant, auoit jetté ses affections sur ladite Preuosté, luy ayant escrit qu'il la vouloit recompenser, & pour en sonder la valeur, il l'auoit fait prendre à ferme par l'un de ses freres, ce qui luy donnoit libre accès en la maison dudit Leber resignant: De sorte qu'ayant sceu qu'il auoit resigné ladite Preuosté, comme il a fort pratiqué en Cour de Rome, pour arrester la deliurance des Bulles sur ladite resignation, il donne ordre de faire mettre vn *nihil transeat* du viuant du resignant, en esperance qu'il ne la feroit pas longue, & cependant qu'il obtiendrait vne prouision par mort.

Ce projet de fraude luy a succédé; car par le moyen de cet obstacle les prouisions dudit Leber resignataire ne luy ont esté deliurées pendant la vie du resignant, lequel estant mort le 9. Avril 1599. Vallet enuoie *per expressum cursorem*, faire pouruoir François Vallet son frere, qui estoit à Nantes, & estoit lors vn simple fermier, & lequel a tousiours plus affecté le Mariage que la Profession Ecclesiastique. Ayant fait son coup & obtenu prouision de ladite Preuosté de Vertou, sous le nom de son dit frere, il fait leuer le *nihil transeat* mis par son ordre & fait extendre la resignation dudit Leber, non pas du datte de Ferrare du 5. Septembre 1598. mais du



27. Aoust 1599. sçachāt que telle extension ne pouuoit seruir apres la mort du resignant.

Ledit Leber est trois moys & demy en ceste ville aux escoutes, à prier & requerir son Banquier de luy faire deliurer ses provisions, il luy fait infinies remises, bien que ledit Leber luy eust baillé vne promesse de luy payer tout ce qu'il fourniroit à Bothe-reau son correspondant en Cour de Rome: Mais la trop familiere hantise & conuersation que Vallet a avec ledit Banquier, fait que ledit Leber demeure frustré de ses Bulles, apres vn sejour de trois moys & demy en ceste ville.

Se voyāt reduit à ceste extremité, & ayant descouuert la fourbe de Vallet, il vouloit en faire informer, & s'en plaindre au Parlement; ce que ledit Vallet craignant, il escriuit des missiues audit Leber, le persuadant de luy resigner ladite Preuosté, que sans luy il ne pourroit auoir ses provisions, que l'affaire estoit accrochée, qu'il auoit donné bon ordre, & qu'il vouloit estre remboursé de ses frais, & que si l'on luy fermoit vne porte il y rentreroit par vne autre.

Ledit Leber estonné de ces menasses, craignant la caballe de Vallet, il se laisse vaincre à ses persuasions, ils font vn concordat en ceste ville le 11. d'Octob. 1599, par lequel ils promettēt respecti- uement se passer procurations irreuocables, sçauoir est Leber de la Preuosté de Vertou à Vallet, & luy audit Leber du Prieuré de la Trinité, & neantmoins qu'ils ne pourront de trois moys faire admettre lesdites procurations.

Mais ce concordat ne fut rien qu'une ampliation des premieres piperies de Vallet, car le iour precedent 10. d'Octobre il auoit resigné ledit Prieuré à Henry Vallet son autre frere, & n'auoit fait apposer la surseance de trois mois que pour faire admettre la premiere procuration en faueur de son dit frere, Et le 13. il passe procuration pour reuocquer celle passée le 11. en faueur dudit Leber, laquelle il se garde bien de luy faire signifier, bien qu'il fust lors en ceste ville & qu'il y eust demeuré plus de quinze iours apres, mais il l'enuoye signifier en Cour de Rome.

Son frere doncques se trouue le premier pourueu, lequel depuis retrocede ledit Prieuré audit maistre Iean son frere, ainsi ils ont valletté & pelotté ce benefice. Ledit Leber ignorant toute ceste trainée prend possession, ledit maistre Iean Vallet le fait appeller aux Requestes, ou ledit Leber conclud afin d'estre maintenu ou au Prieuré de Fougeres, ou en la Preuosté de Vertou. En

fin Vallet ayant resigné (pour n'vser point d'un mot plus rude, mais plus veritable) à Gigan il euoque la cause au conseil sous le nom d'un nommé Chastel lacquais dudit Vallet, lequel il feint estre pourueu par le Cardinal de Ioyeuse pour euoquer seulement & apres la retention le fait euanouir.

Le Conseil pendant le proces recongneut que ledit Leber auoit en vertu d'une commission rogatoire fait assigner en Cour de Rome Vallet pour proceder à la faction des extraits de ses provisions. C'est pourquoy par son arrest interlocutoire du mois de Septembre 1604. il ordonna que ledit Leber veriffieroit que Vallet auoit fait mettre le *nihil transeat*, aquoy il pretend auoir satisfait, tellement que le procez est en estat.

Or les conclusions dudit Lebert sont alternatiues, & tendent à deux fins, ou d'estre maintenu au Prieuré de la Trinité, ou en la Preuosté de Vertou: Quant au Prieuré, Gigan luy dit que sa procuracion a esté reuouquée, & partant que sa prouision est nulle, à quoy il respond que par le concordat Vallet est obligé de passer vne procuracion irreuocable; ce qui l'empesche de pouuoir resigner à vn autre: Car quand l'on a tenu qu'il est loysible de reuouer des procuratiōs, & que ceste volōté est muable, & cōme l'on dit ambulatorie: Cela est vray en vne procuracion pure & simple, ou *in fauorem*, laquelle n'est point necessitée par vne permutatiō, & par vn serment de ne reuouer point: Ce qui ne se peut faire sans pariure, & le Rebuffe, voire tous les Canonistes, desquels il a puisé sa doctrine, tiennent que la reuocation *In causa permutacionis est nulla, quia facta in fraudem, & ludibrium*, tout le recours de Gigan est de repeter de Vallet ce qu'il luy a baillé, & de ses despens, dommages, & interestz: De sorte que ceste pretendue reuocation ne peut nuire audit Leber, lequel par consequent est le premier pourueu dudit Prieuré.

Mais enfin quand ledit Leber n'obtiendrait audit Prieuré de Fougères *soluta contractu*, il doit rentrer en la Preuosté de Vertou. A quoy Vallet luy respond qu'il n'a point de tiltre, que sa resignation est admise apres la mort, que Leber la pippé, qui luy a fait entendre qu'il estoit bien pourueu, que les trois mois qu'il auoit fait mettre au Concordat estoit pour s'enquerir s'il estoit bien pourueu, que le *nihil transeat* ne prouenoit point de luy, qu'il n'a esté mis pendant la vie du resignant, ains apres sa mort. Voila les destours dont Vallet veut esquiuier la pointe des raisons & de la verité, qui descouurent au Conseil, & font voir à tous les Iuges de ce Roy-

aumela plus superlatifue piperie qui fut iamais commise, mais les missiues & l'extraict de Court de Rome non seulement le rendēt sans droict, sans excuse & sans raison, mais le rendent vn plagiaire, vn stellionnataire, & vn corsaire de benefice.

C'est vn grand effet de la verité que toutes sortes d'armes rebouschent contre son escu. Vallet dit que Leber l'a voulu piper, qu'il luy a passé procuration d'un benefice auquel il n'auoit rien, qu'il a voulu auoir vn delay de trois mois pour s'enquerir de l'estat de son benefice, *sed ubi pudor, ubi fides*. Vallet est conuaincu par ses missiues, par lesquelles il escrit audit Leber, qu'il n'aura iamais expedition de son affaire sans luy, qu'elle est acrochée, qu'il veut retirer ses frais, qu'il y a mis bon ordre, que si l'on luy ferme vne porte qu'il entrera par vn autre. Quel nuage peut-il opposer à ceste clarté? De quel ancre peut-il noircir vne escriture si claire? Cela ne montre-il pas qu'il scauoit qu'elles estoient les prouisiōs dudit Leber, puis qu'il dit qu'elles sont acrochées, que l'acroche ne s'en peut leuer que par luy. Cela se peut-il mieux entendre que du *nihil transeat* Principallement quand il adioust qu'il veut estre rembourfé de ses frais, qu'il y a mis bon ordre, & s'y l'on luy ferme vne porte qu'il entrera par vne autre.

Aussi par ses contredits il n'a peu apporter autre emplastre sinon qu'il escriuoit lesdites lettres audit Leber, luy donnant aduis de ce qu'il deuoit faire: ô la charitable consultation: Vallet en fait grade, il en tient escolle à vn chacun, comme s'il estoit croyable que Vallet en ses aduis qu'il donne touchant les benefices, eust voulu conseiller ledit Leber contre François Vallet son frere *Imò* contre luy mesme qui en a le droict: Car il est vray que tel conseil eust esté pour exclure la prouision par mort de François Vallet, qui est le seul droict dont il combat la resignation dudit Leber.

Ceste excuse doncques n'est pas de mise, & n'est à croire que Vallet ignorast quel estoit le droit dudit Leber, puis qu'il en discourroit avec telle subtilité, & en terme de conseil & d'aduis: aussi par le concordat il s'est contenté de la simple procuration dudit Leber, & d'une grosse de son resignant, voyre que ledit Leber a stipulé qu'il ne seroit tenu d'aucuns fraiz des procez: De sorte que Vallet a pris ladite procuration, s'il faut ainsi dire, à toute risque, il a sceu l'accroche & l'enclouëure, il a sceu *quâ ratem impediēbat Echeneis*, tellement qu'il ne peut dire que Leber ne luy a rien resigné.

Mais l'effronterie n'a point de meilleure deffence que de re-

jetter sa propre coulpe sur ceux qui en sont innocents : ainsi fait Vallet, il dit que Leber l'a voulu tromper. Le Conseil iugera qui a fait où souffert la tromperie : Vallet estoit fermier de l'Oncle dudit Leber, il estoit comme son domestique, *stabat excubitor, & tanquam coruus ad cadauer instabat morienti*, Il a fait arrester la resignation admise en faueur dudit Leber, il a fait pourvoir son frere: Puis apres pour s'exempter de la preuue de son stelliōnat, il resigne le Prieuré de Fougeres le 11. & le iour precedent il l'auoit resigné à vn sien autre frere. Il fait apposer trois moys de surseance pour faire admettre la prouisiō de sondit frere, & deux iours apres il passe procuratiō pour reuoker, laquelle il ne fait point signifier audit Leber, l'entretenant perfidement en ceste ville de l'expedition de la prouision du Prieuré de Fougeres. Et cependant en Cour de Rome il faisoit operer sa pretendue reuocation : En cela il ne faut que le simple discours, il ne faut point exagerer ceste meschanceté par l'aigreur d'un style, il suffit assez de la représenter.

Les missiues doncques monstrent deux choses: l'une que Vallet a sceu quel estoit le droit dudit Leber: l'autre qui est l'autheur du *nihil transeat*. Mais de quelle boutique peut sortir ceste drogue? quelle Pādore peut auoir ietté ce poison? vn *nihil transeat* ne se trouue pas en vn registre sans qu'il y soit mis, *non ut fungi qui suapte agris inuascuntur. Hoc posito* qu'il y a vn *nihil transeat*. Il faut sçauoir qui en est l'autheur: Car comme l'existence d'un fils presuppose vn pere, la clarté du iour le leuer du soleil, aussi il faut dire que quelqu'un a fait mettre le *nihil transeat*.

Mais Vallet a ce mot, à la responce prompte, & dit qu'il n'est pas porté par l'extraict que c'est luy qui l'a fait mettre, & par consequent qu'il n'en est pas l'autheur: voila mal parer aux coups, non seulement par les raisons de droit, ains par le sens commun. Par les consequences & inductions necessaires on trouue l'origine des choses. C'est pourquoy nos ancestres en la disquisition des choses occultes ont regardé pourquoy vne chose est faicte, à quel dessein & intentiō. Et pour ce Cassius introduisoit ceste formule, *Quorsum istud? vel cui bono?*

Ceste formule nous seruira d'indice pour congnoistre qu'il n'y a que Vallet qui soit autheur de ce *nihil transeat*, Car il n'y a que luy qui en tire le profit. Son frere par ce moyen a esté pourueu *per obitu* de ladite Preuosté, son frere, *inquam*, marchant fermier peu de temps apres marié, & qui n'eut iamais desir d'estre d'Eglise, & qui depuis a resigné audit Vallet: C'est donc luy qui tire le profit de

c'est obstacle que l'on en peut dire l'auteur, car sans vne expresse charge on ne reçoit pas tels malheureux empeschemens.

Il dit que la procuration dudit Leber ne luy a point seruy, que c'est vn parchemin inutile, & toutesfois le conseil voit le contraire, & que sans ce droit que Leber luy a resigné, vn pourueu par le collateur ordinaire qui precedoit ledit François Vallet, & vn indultaire eussent emporté ladite Preuosté: Mais il les a exclus par le droit dudit Leber.

Estant conuaincu par si fortes circonstances d'estre l'auteur dudit *nihil transeat* il dit qu'il est mis apres la mort & pour empescher l'extension non du datte de Ferrare, mais de celui du 27. d'Aoust 1599. Vallet veut excuser sa malice par vne ignorance, car qu'eust serui le *nihil transeat* apres la mort pour empescher vne resignation qui eust esté nulle de soy sans ceste inuention? Qu'il soit mis pour empescher l'extension du 27. Aoust, cela est faux, Car l'extension est faite dudit iour par l'entremise de Vallet, lequel ayât fait pour uoir son frere, afin que la resignation du Ber se trouuaist admise apres la mort, il a fait extendre la grace non point du datte de Ferrare, mais du 27. Aoust, Ce qui ne peut prouenir que de luy & non dudit Leber, comme il suppose, lequel par tel acte eust ruiné sa resignation la faisant extendre apres la mort.

Mais les termes de l'extraict du liure du dattaire sont plus forts, plus exprez & decisifs que les gloses de Vallet: Car ledit extraict porte que le *nihil transeat* a esté mis *pro impedienda extensione prædictæ dattæ*, ce qui ne se peut entendre que de celle de Ferrare, dont il est parlé en la clause precedente: Ce qui fait voir que ce n'estoit pas pour empescher celle du 27. Aoust, dont l'extension est faite.

Mais il plaira au conseil de noter que ladite resignation fut admise du viuât du deffunt, pour ce que l'extraict porte, *super præpositura vacante per cessionem Michaelis Leber*, Ce qui monstre que du viuant du resignant la resignatiou estoit parfaite & accomplie, & que pour en empescher la deliurance on fist mettre le *nihil transeat*, Car outre qu'il estoit inutile de le mettre apres la mort pour annuler vne resignation: s'il eust esté apres la mort, le dattaire ne l'eust pas enregistré aux termes qu'il est extraict de son liure: Mais eust vsé de ces mots *super præpositura vacante per obitum vel attento obitu*, au contraire il y a *vaccante per cessionem*.

Il a voulu dire que c'estoit vne petite datte: mais on luy a repliqué que les petites dattes ne s'extendent point, & qu'apres six mois on les brusle, & celle de la resignation dudit Leber est mise

au registre & extenduë d'un datte preposteré toutesfois par l'effort de Valet: ce qui monstre par necessité qu'il faut que la procuration à resigner ait esté enuoyee, d'autant qu'il est deffendu d'extendre des resignations & mettre le consent au dos, sans que le procureur qui le preste ne soit saisy de la procuration: Et toutesfois Vallet ne fait que crier par le procez que ladite procuration n'a iamais esté enuoyee, & qu'il n'en appert point par le registre du Bancquier, ce que l'extrait de Cour de Rome iustifie estre faux, puis que l'extension est faite, & le consent presté: ce qui presuppose par necessité que ladite procuration a esté enuoyee, ce que l'on doit croire auoir esté fait pendant la vie, pource que l'extrait porte que ladite Preuosté *vaccabat per cessionem Michaëlis Leber*. Aussi qu'apres la mort on n'eust pas admis vne resignation, ne fait l'extension d'icelle le 27. Aoust, attendu mesmes le *nihil transeat*, & que François Vallet en May auparauant en auoit esté pourueu par mort.

Quant à ce que le registre du Bancquier n'en est point chargé, ledit Leber remonstre que ledit Bancquier s'est rendu partial en ceste cause, a deposé en faueur de Vallet sās ordonnance du cōseil, qu'il est son intime & singulier amy, n'a point voulu de salaire des extraits que ledit Vallet a fait sur son registre, qu'iceluy Vallet l'a cōuié depuis le procès en vn bāquet qu'il fit en vn iardin aux faux bourgs, que ledit Banquiera tenu trois mois & demy Leber sur l'attēte de ses bulles, a pris vne promesse de luy de le rembourser de tout ce qu'il aduanceroit à Bothereau son correspondant, qui sont preuues indubitables qu'il a esté chargé de la procuratiō, laquelle se trouuant admise voire extendue, bien que d'un faux datte, il est impertinent de dire qu'elle n'a point esté enuoyee.

Aussi l'arrest interlocutoire du conseil a retranché toutes ces poinctilles, & imposé vne seule chose audit Leber de verifier que Vallet a fait mettre le *nihil transeat*, A quoy il pretend auoir deüment satisfait, Et ne seruira audit Vallet de dire qu'il n'appert pas que ledit *nihil transeat* ait esté mis par luy & que le conseil a desiré la preuue expresse de ce poinct, Le conseil n'a point entendu imposer vne impossibilité audit Leber, lequel a verifié ce qui se peut en Cour de Rome ou l'on ne met point le nom de celuy qui fait mettre le *nihil transeat*, tellement que ledit Leber ne peut pas rapporter *expresso nomine* que ce soit Vallet qui a fait mettre le *nihil transeat*. Mais il le verifie par tant d'argumens, par tant de circon-

stances, par ses propres missiues, si clairemēt que d'en desirer vne plus exacte preuue, *Id effet mera meridie lucem querere.*

Partant, s'il plaist au Conseil, ledit Leber sera maintenu audi^d Prieuré de Fougeres, ou en ladite Preuosté de Verrou, avec restitution de frui^{ts}, despens, dommages & interests.



*Jeuneur & c. de Paris
le 10. de Mars 1711. de Paris*